

Los ntawm Thawj Tswj Hwm
Dieter F. Uchtdorf

Tus Pab Cuam thib Ob hauv
Thawj Pawg Thawj Tswj Hwm



Vajtswv txoj Lus rau Nws cov Me Nyuam

Cov vaj lug kub qhia peb tias yam thib ib uas Vajtswv ua tom qab Nws tsim txiv neej thiab poj niam yog hais lus rau nkawd.¹ Nws muaj tej lus xov xwm thiab tej lus qhia uas muaj nqis hais rau nkawd. Nws lub hom phiaj tsis yog muab lub nra rau nkawd los yog ua rau nkawd txhawj tiam sis yog kom koj nkawd mus rau kev zoo siab thiab yeeb koob nyob mus ib txhis.

Thiab qhov no yog qhov chiv keeb xwb. Txij hnuv ntawd los txog niaj hnuv no, Vajtswv tau txuas lus nrog Nws cov me nyuam. Nyob hauv txhua tiam neeg Nws cov thwj tim tau kawm Nws txoj lus thiab muab tshwj tseg cia. Cov uas xav paub Vajtswv lub siab nyiam hwm Nws txoj lus, thiab lawv ua tim khawv txog qhov tseeb hais tias, “Tus Tswv uas kav ib puas tsav yam yuav ua ib yam dab tsi, nws yeej xub qhia rau nws cov tub qhe uas yog cov yaj saub paub ua ntej nws mam ua.”²

Nov yog tus txheej txheem txij thaum chiv keeb los, thiab tseem ua raws li tus txheej txheem no niaj hnuv no. Qhov no tsis yog ib zaj dab neeg hauv phau Vaj Lug Kub Npaiv Npaum xwb; yog Vajtswv txoj kev qhia tej zaj lus tseem ceeb rau Nws cov me nyuam. Nws tsa tib neeg uas nyob hauv peb, hu lawv los ua cov yaj saub, thiab muab tej lus rau lawv hais, uas siv kom caw peb “txais nws txoj lus, zoo ib yam li los kiag ntawm [Nws] lub qhov ncauj los.”³ Nws tau tshaj tawm hais tias, “Txawm yog los ntawm Nws lub suab los yog los ntawm Nws cov tub qhe lub suab, yeej zoo ib yam.”⁴

Nov yog ib zaj lus ntawm txoj Kev Muab Txoj Moo Zoo Txum Tim Rov Qab Los uas muaj yeeb koob, kev txhawb nqa, thiab kev cia siab zoo tshaj plaws—Vajtswv tsis nyob

ntsiag to xwb! Nws hlub Nws cov me nyuam. Nws tsis tso peb nyob peb tus kheej ua loj leeb hauv kev tsaus ntuj.

Ob zaug txhua xyoo, thaum lub Plaub Hlis Ntuj thiab Kaum Hli Ntuj, peb muaj cib fim mloog tus Tswv lub suab dhau los ntawm Nws cov tub qhe nyob hauv peb lub tuam rooj sab laj.

Kuv ua tim khawv rau nej hais tias ua ntej ib tug neeg hais lus nyob hauv lub tuam rooj sab laj mus txog lub sam thiaj, nws twb tau siv zog, thov Vajtswv, thiab kawm ntawv kom ua raws li kev txib hais lus. Txhua zaj lus hauv lub tuam rooj sab laj yog hais vim cov neeg hais lus tau siv sij hawm ntev kom npaj thiab tau thov Vajtswv kom to taub tias tus Tswv xav kom Nws Tsoom Haiv Neeg Ntseeg hnov dab tsi.

Yuav muaj li cas yog tias peb cov uas mloog lus tau npaj ib yam li cov hais lus? Peb yuav ua txawv li cas thaum muaj lub tuam rooj sab laj yog tias peb saib lub rooj sab laj zoo li yog ib lub cib fim txais tej zaj lus los ntawm tus Tswv Nws tus kheej? Dhau los ntawm cov nkauj thiab cov lus hauv lub tuam rooj sab laj, peb txais tau tej lus teb peb tej teeb mem los yog tej lus nug uas peb muaj.

Thaum twg nej xav paub seb Leej Txiv Saum Ntuj Ceeb Tsheej puas yuav hais lus rau nej, kuv xav kom nej nco txog tej lus tseem ceeb nyob hauv zaj nkauj uas peb cov me nyuam hauv lub Koom Haum Me Nyuam Yaus hu nkauj: “[Nej] yog Vajtswv me nyuam. [Nej] nyob hauv ntiaj teb no.” Nws lub hom phiaj yog pab nej kom “[nej] tau nrog Nws nyob.”

Yog tias nej hais rau Leej Txiv Saum Ntuj Ceeb Tsheej zoo li nej yog Nws tus me nyuam, nej nug tau Nws nrog

ib lub siab xav paub tiag tiag hais tias, “Qhia kuv, pab kuv, nrog kuv mus kev, pab kuv nrhiav qhov yog. Qhia kuv txhua yam kuv yuav ua.” Nws yuav hais lus rau nej dhau los ntawm Nws tus Vaj Ntsuj Plig Dawb Huv, ces nyob ntawm nej kom “ua raws li Nws lub siab nyiam.” Kuv cog lus rau nej hais tias yog nej ua li ntawd, “Nws yuav foom hmoov rau [nej].”⁵

Yeej tsis tau muaj ib lub sij hawm hauv lub ntiaj teb uas xav tau tus Tswv txoj kev coj npaum li xav tau niaj hnuv no. Thaum peb npaj siab mloog tus Tswv txoj lus, thov kom peb yuav rau siab nrhiav tus Ntsuj Plig ntawm qhov tseeb ces thaum tus Tswv hais lus dhau los ntawm Nws cov tub qhe, peb thiaj yuav to taub, txais kev txhawb nqa, thiab zoo siab ua ke.⁶

Kuv ua tim khawv tias “los ntawm kev ua tej yam no ces tej qhov rooj ntawm ntuj txiag teb tsaus yuav kov tsis yeej [peb]; muaj tseeb tiag, thiab tus Tswv Vajtswv yuav ua kom tej hwj chim ntawm txoj kev tsaus ntuj yaj ploj ntawm [peb] mus, thiab ua kom lub ntuj co nto kom zoo rau [peb], thiab nws lub npe lub yeeb koob.”⁷

LUS CIM

1. Saib Chiv Keeb 1:28.
2. Amais 3:7.
3. Lus Qhuab Qhia thiab Kev Khi Lus 21:5.
4. Lus Qhuab Qhia thiab Kev Khi Lus 1:38.
5. “Kuv Yog Vajtswv Me Nyuam,” *Cov Nkauj Qhuas Vajtswv*, zaj 142; *Children's Songbook*, 2-3.
6. Saib Lus Qhuab Qhia thiab Kev Khi Lus 50:21-22.
7. Lus Qhuab Qhia thiab Kev Khi Lus 21:6.

QHIA LOS NTAWM TSAB XOY NO

Nyob hauv lub tuam rooj sab laj peb txais tau lus teb rau peb tej lus nug thiab tej teeb meem thaum peb mloog Vajtswv cov tub qhe uas Nws tau xaiv tseg. Cia li xav seb puas xav sib tham nrog cov uas koj qhia hais tias: Nej yuav npaj li cas kom txais tau tej lus teb zoo li no nyob hauv lub tuam rooj sab laj? Thawj Tswj Hwm Uchtdorf yaum kom peb “rau siab nrhiav tus Ntsuj Plig ntawm qhov tseeb.” Koj xav hais tias qhov no txhais li cas, thiab koj yuav ua li cas kom siv qhov no thaum koj tab tom npaj? Ntxiv rau cov koob hmoov nyob hauv phau Lus Qhuab Qhia thiab Kev Khi Lus 21:6, muaj cov koob hmoov ntxiv thaum koj npaj mloog tus Tswv tej lus dhau los ntawm Nws cov tub qhe? Tej zaum koj yuav xav caw cov uas koj qhia kom sau hauv ib phau ceev xwm txheej hais tias tus Ntsuj Plig qhia lawv txog dab tsi nyob hauv lub tuam rooj sab laj no.

COV HLUAS

Kev Npaj Hnov Vajtswv lub Suab

Thawj Tswj Hwm Uchtdorf piav hais tias thawj yam uas Vajtswv ua tom qab Nws tsim txiv neej thiab poj niam yog hais lus rau nkawd thiab muab tej lus xov xwm thiab tej lus qhia uas muaj nqis hais rau nkawd. Peb txais tau txoj koob hmoov zoo tib yam thaum lub Plaub Hlis Ntuj thiab Kaum Hli Ntuj hauv lub tuam rooj sab laj, thaum cov thawj coj ntawm lub Koom Txoos hais lus rau peb thiab ntuas peb uas tus Tswv xav kom peb hnov.

Koj puas tau hnov Vajtswv lub suab dhau los ntawm Nws cov tub qhe nyob hauv lub tuam rooj sab laj? Koj puas tau xav hais tias muaj ib zaj lus uas ua rau koj txais lus teb uas koj nrhiav? Nyob hauv ib phau ceev xwm txheej, tej zaum koj yuav xav sau txog lub sij hawm ntawd thiab tau pab koj li cas. Ces cia li npaj mloog tus Tswv lub suab hauv lub rooj sab laj tom ntej no los ntawm txoj kev sau tej lus nug uas koj muaj thiab kev kawm txog tej lus nug ntawd thaum koj kawm vaj lug kub. Thov Leej Txiv Saum Ntuj Ceeb Tsheej, thov kom txais lus teb thiab tswv yim hauv lub rooj sab laj. Thaum koj mloog tus Tswv cov tub qhe, cia li tsom ntsoov rau tej kev tshoov siab uas los rau koj tus kheej. Koj tau kawm dab tsi? Koj tau txais kev tshoov siab kom hloov siab li cas? Cia li sau tej kev tshoov siab no cia vim yog tus Ntsuj Plig txoj kev hais lus rau koj!

Nco ntsoov tias Leej Txiv Saum Ntuj Ceeb Tsheej hlub koj thiab yuav coj koj mus rau qhov yog. Thaum koj siv zog mloog Nws lub suab dhau los ntawm Nws cov tub qhe, koj yuav tau koob hmoov thiab txais tej lus qhia zoo.

COV ME NYUAM

Npaj rau lub Tuam Rooj Sab Laj!

Cia li sau ntawv txog tej no rau ib daim ntawv. Khaws daim ntawv rau koj tus kheej nyob hauv lub rooj sab laj koj thiaj sau tau tej yam uas koj tau kawm.

Cia li sau koj tej lus nug. Kuv xav paub txog . . .

Cia li thov Leej Txiv Saum Ntuj Ceeb Tsheej. Kuv xav tau kev pab kawm txog . . .

Cia li mloog lub tuam rooj sab laj. Kuv tau kawm . . .



Kev Ntseeg, Tsev Neeg,
Kev Pab

Thov Vajtswv Pab Txhua tus Viv Ncaus

Peb txoj kev hlub cov uas peb mus saib xyuas tom tsev thiab kev tshoov siab txog lawv yuav loj tuaj thaum peb txo hwj chim thov Vajtswv pab txhua tus viv ncaus.

Cov vaj lug kub qhia txog ntau tus txiv neej thiab poj niam tus yam ntxwv uas thov Vajtswv pab lwm tus. Ib zaj uas raug siab ntsws heev yog hais txog Amas tus Hluas leej txiv. Ib tug tim tswv hais lus rau Amas tus Hluas, qhia nws hais tias nws txiv “tau thov nrog kev ntseeg ntau heev ntsig txog koj . . . ; yog li ntawd, vim yog rau lub hom phiaj no kuv thiaj tau los ua kom koj paub txog Vajtswv lub hwj chim thiab txoj cai, xwv kom nws yuav teb tau nws cov tub qhe tej lus thov raws li lawv txoj kev ntseeg” (Mauxiyas 27:14).

Thaum peb ib leeg thov Vajtswv pab ib leeg ces ua rau peb lub siab qhib plho kom txais tau cov koob hmoov uas tus Tswv xav pub rau peb. “Lub hom phiaj ntawm kev thov Vajtswv tsis yog kom Vajtswv hloov Nws lub siab nyiam, tiam sis yog kom peb tus kheej thiab lwm tus txais tau cov koob hmoov uas Vajtswv txaus siab pub rau peb, tiam sis peb yuav tsum thov ua ntej kom peb txais tau.”¹

Ib tug viv ncaus qhia hais tias thaum ib lub sij hawm nyuaj hauv nws lub neej, ib tug mus saib xyuas tom tsev hu xov tooj los yog ntaus ntawv rau nws thaum txog “tej hnub tsaus ntuj heev.” Zoo li nkawd paub thaum twg nws xav tau kev txhawb nqa. Nws paub tias nkawd ob leeg thov Vajtswv pab nws, thaum nkawd tuaj xyuas thiab thaum nkawd nyob nkawd xwb.

Julie B. Beck, Koom Haum Niam Tsev tus Tuam Thawj Tswj Hwm hais tias, “Cia li xav seb peb yuav muaj zog npaum li cas yog tias txhua tus viv ncaus yuav thov Vajtswv tiag tiag txhua tag kis thiab txhua hmo, los yog, zoo dua yog lawv thov Vajtswv tsis tu tsis tseg zoo li tus Tswv tau txib.”² Kev thov Vajtswv pab cov uas peb mus saib xyuas tom tsev txhawb nqa peb tus kheej thiab txhawb nqa peb txoj kev ua poj niam uas yog Tsoom Haiv Neeg Ntseeg.

Thawj Tswm Hwm Henry B. Eyring, tus Pab Cuam thib Ib hauv Thawj Pawg Thawj Tswm Hwm hais

tias: “[Cia li] thov Vajtswv kom paub lawv lub siab. . . . Nej yuav tsum paub tias Vajtswv xav kom nej ua li cas kom pab lawv thiab ua txhua yam nej ua tau, nrog rau Vajtswv txoj kev hlub rau lawv.”³

LUS CIM

1. Guide to the Scriptures, “Prayer.”
2. Julie B. Beck, “What Latter-day Saint Women Do Best: Stand Strong and Immovable,” *Liahona*, Kaum Ib Hlis Ntuj 2007, 110.
3. Henry B. Eyring, “Lub Pov Thawj Hwj thiab Kev Thov Vajtswv,” *Liahona*, Tsib Hlis Ntuj 2015, 85.

Xav Txog Qhov No

Koj tau txais kev tshoov siab thiab tswv yim dab tsi thaum koj tau thov Vajtswv pab cov viv ncaus uas koj mus saib xyuas?

Kev Txhawb Pab

Thaum peb thov Vajtswv pab txhua tus viv ncaus, peb yuav txais kev tshoov siab kom paub pab txhua tus viv ncaus uas peb mus xyuas.